



## KONTROLLI I LARTË I SHTETIT DEPARTAMENTI I AUDITIMIT TË PERFORMANCËS

Adresa: Bulevardi "Dëshmorët e Kombit", nr. 3, Tiranë; Tel-Fax: 0693067738

E-mail: [rmuca@klsb.org.al](mailto:rmuca@klsb.org.al); Web-site: [www.klsb.org.al](http://www.klsb.org.al)

### Auditim performance: “ZBATIMI I STRATEGJISË KOMBËTARE TË MENAXHIMIT TË MBETJEVE URBANE NË RASTIN E BASHKISË FIER”

#### Përmbledhje Ekzekutive

Në zbatim të planit vjetor 2013, Kontrolli i Lartë i Shtetit, në kuadër të përmbushjes së funksionit të tij Kushtetues, zbatimit të Udhëzimeve dhe Standardeve Ndërkombëtare të Auditimit (INTOSAI, EUROSAI, etj.), ndërmoi auditimin me temë “Zbatimi i Strategjisë Kombëtare të Menaxhimit të Mbetjeve Urbane në Rastin e Bashkisë Fier”. Ky auditim u programua për t’u ushtruar në Bashkinë Fier dhe Ministrinë e Mjedisit, pasi këto janë institucionet që kanë përgjegjësi direkte në ofrimin e këtij shërbimi. Pas përfundimit të punës paraprake audituese u përgatit programi auditues. Në përfundim të punës audituese në terren, iu dërgua projekt-raporti i auditimit subjekteve dhe palëve të interesit. Raporti përfundimtar është hartuar pasi janë shqyrtuar observacionet dhe shpjegimet e dërguara nga institucionet e përfshira në këtë auditim si dhe pas konsultimeve me palët e interesit.

Në përfundim, pasi Kryetari u njoh me Raportin Përfundimtar të Auditimit dhe projekt-vendimin e paraqitur nga Grupi i Auditimit të Departamentit të Auditimit të Performancës, mbi aktivitetin dhe cilësinë e kontrollit nga Drejtori i Departamentit të mësipërm, Drejtori i Drejtorisë Juridike Sigurimit të Cilësisë dhe Analizës së Riskut, në mbështetje të nenit 9 dhe 16 të Ligjit nr. 8270, datë 23.12.1997 “Për Kontrollin e Lartë të Shtetit”, me ndryshimet e bëra me Ligjin nr. 8599, datë 01.06.2000,

#### V E N D O S I:

**I.** Të miratojë Raportin Përfundimtar të Auditimit të Performancës mbi “Zbatimin e Strategjisë Kombëtare të Menaxhimit të Mbetjeve Urbane në rastin e Bashkisë Fier”, të ushtruar në Bashkinë Fier.

**II.** Të miratojë rekomandimet e përcaktuara dhe të kërkojë marrjen e masave, për sa vijon:

#### **A. MASA ORGANIZATIVE**

##### **Rekomandim 1:**

Bashkia Fier në shërbim të qytetarëve e mbrojtjes së mjedisit të zbatojë strategjitë afatmesme e afatgjata për parandalimin e ndotjes dhe të marrë masa të forta për të nxitur zgjedhjen e opsionit më të mirë për minimizimin e mbetjeve, depozitimin, rikuperimin, riciklimin e kompostimin si dhe ripërdorimin e reduktimin e mbetjeve.

*Në vijimësi*

##### **Rekomandime 2:**

- Ndërmarrja e pastrimit Fier bazuar në standardet e BE-së të përcaktojë, rregullore, udhëzime, kritere, standarde, manuale dhe dokumente e formularë standardë që duhen

në të gjitha fazat e menaxhimit teknik dhe trajtimit mjedisor të mbetjeve urbane nga grumbullimi deri tek depozitimi i tyre.

- Bashkia Fier në bashkëpunim me Ministrinë e Mjedisit Pyjeve dhe Administrimit të Ujërave të marrë hapat e duhur ligjorë për mbylljen e fushës së depozitimit të mbetjeve urbane të qytetit Fier dhe ndërtimin e një landfilli të ri rajonal për depozitimin përfundimtar të mbetjeve urbane.
- Bashkia Fier në bashkëpunim me Ministrinë e Shëndetësisë, Spitalin Rajonal të Fierit dhe struktura të tjera t'i japë zgjidhje të menjëhershme mënyrës së depozitimit, grumbullimit, transportimit dhe trajtimit të mbetjeve spitalore me ndikim shumë negativ në mjedis dhe shëndetin human.

*Në vijimësi*

### **Rekomandim 3:**

Bashkia duhet të nxisë realizimin e modelit të ndarjes në burim të mbetjeve urbane sipas një kompozimi “praktik” të koshit të riciklimit dhe në përputhje me strategjinë e MMPAU-së, në mbetje:

- të riciklueshme (të thata);
- organike/të ndryshme (të njoma);
- të rrezikshme.

*Në vijimësi*

### **Rekomandim 4:**

Të miratohet në Këshillin Bashkiak të Qytetit të Fierit Plani Lokal i Menaxhimit të Mbetjeve Urbane i hartuar në vitin 2010 në bashkëpunim me CO-Plan dhe të fillojë zbatimin e tij.

*Menjëherë*

### **Rekomandim 5:**

Bashkia Fier duhet të vendosë, cilët materiale duhet të riciklohen, cilët materiale do të grumbullohen dhe në çfarë volumi, në mënyrë që të fillojë planifikimin e programit të riciklimit i bazuar në legjislacionin specifik të vendit, duke siguruar një mundësi bashkëpunimi midis publikut dhe sektorëve privatë.

*Në vijimësi*

### **Rekomandim 6:**

Bashkia Fier të ndërmarrë hapat e duhur ligjorë që Ndërmarrja e Pastrimit Fier dhe kompania e kontraktuar nga Bashkia Fier për riciklimin e mbetjeve urbane, të pajisen me leje mjedisore për ushtrimin e aktivitetit të tyre.

*Menjëherë*

### **Rekomandim 7:**

- Bashkia Fier në bashkëpunim me donatorët të hartojë programe efektive për edukimin e publikut (komuniteti, shkollat) në drejtim të çështjeve që kanë të bëjnë me menaxhimin e mbetjeve dhe riciklimin e tyre, duke siguruar bashkëpunimin me qytetarët dhe sektorin privat, bazuar në legjislacionin specifik të vendit.
- Bashkia Fier të hartojë program të veçantë për të arritur progresin e nevojshëm në procesin e ndarjes së mbetjeve shtëpiake në kazanë të ndryshëm, me qëllim riciklimin e tyre, në drejtim të:
  - informimit dhe ndërgjegjësimin e komunitetit në nivel lokal,

- stimulimit promovimit dhe mbështetjes së publikut.

*Në vijimësi*

**Rekomandim 8:**

Bashkia Fier të monitorojë performancën për çdo komponent të veçantë të menaxhimit të mbetjeve urbane më qëllim që ai të jetë sa më eficient dhe efikas për të ardhmen.

*Në vijimësi*

**Rekomandim 9:**

Bashkia Fier në bashkëpunim me Ndërmarrjen e Pastrimit të Qytetit të Fierit, të:

- llogarisë saktë koston e plotë të menaxhimit të mbetjeve urbane,
- përcaktojë tarifën e diferencuar për çdo kategori që përfiton në bazë të koston,
- mundësojë rritjen e nivelit të arkëtimit të tarifave të pastrimit,
- kryejë rakordime për përcaktimin e saktë të numrit të bizneseve dhe numrit të familjeve të cilët paguajnë tarifën së pastrimit,
- të mundësojë rritjen e investimeve në fushën e menaxhimit të mbetjeve urbane.

*Në vijimësi*

**Rekomandim 10:**

Bashkia Fier të marrë parasysh hartimin e Rregullores së Menaxhimit të Mbetjeve Urbane duke u mbështetur në Strategjinë Kombëtare të Mbetjeve si dhe në Planin Lokal të Menaxhimit të Mbetjeve Urbane.

*Në vijimësi*

---

**Grupi i auditimit**

Keida Muça

Elfrida Agolli

Alfred Zylfi

Sazan Guri (Ekspert i jashtëm)

**Drejtori**

Rinald Muça

Tiranë, Korrik 2013

